

**Uunga siunnersuut: Procenti aaqqiissutissaq aamma maannakkorpiaq aningaasarsiat pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2019-meersoq**

(Aningaasaqarnermut Nunanilu Avannarlerni suleqatigiinnermut Naalakkersuisoq)

**Saqqummiussissut**

(Aningaasaqarnermut Nunanilu Avannarlerni suleqatigiinnermut Naalakkersuisoq)

**Siullermeerinnineq**

Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisissaattut siunnersuut Naalakkersuisut sinnerlugit matumuuna saqqummiuppara.

Siunnersuuteqarnikkut oqaatsit marluk atorlugit allanneqarnerat naapertuuttunngortinneqarpoq. Maannakkorpiaq aningaasarsiat aningaasarsianut, aalajangiinnermut tunngavigineqartunut naleqqiullugit ukiup isertitaqarfiusup sinnerani 10 procentimik tassangaluunniit annertunerusumik allannguuteqartussatut ilimagineqarpata, isertitassatut ilimagineqartut tunuliaqutaralugit naatsorsorneqassasut aalajangersakkap danskisuuani oqaatigineqarpoq, aalajangersakkallu kalaallisuuani allassimalluni isertitat 5 procentimik allannguuteqarpata naatsorsuisoqassasoq. Siunnersuutikkut oqaatsit taakku marluk akornanni assigiinngissut atorunnaarsinneqarpoq.

Tamatuma kingorna ukiup isertitaqarfiusup sinnerani maannakkorpiaq isertitat 5 procentimik annertunermilluunniit allanngortussatut naatsorsuutigineqarpata maannakkorpiaq aningaasarsiasatut naatsorsuutigineqartut nutaamik naatsorsorneqassapput.

Malittarisassat maanna atuuttut pisut ilaanni naapertuutinngitsut paasineqarpoq. Inuit ataasiakkaat aningaasarsiatigut atugaasa allannguuteqartarnerat malittarisassani ullumikkut aallaavigineqartarpoq. Pineqartut annikitsuaraannarmik aningaasarsiaqartarpata aningaasarsiaat annikitsuinnarmik allannguuteqaraluarpataluunniit maannakkorpiaq aningaasarsiat nutaamik naatsorsorneqartarput. Pineqartut kisermaajuppata maannakkorpiaq aningaasarsiaasa annikinnerusumik allannguutaat taamaattut pingaaruteqarput. Minnerunngitsumik aningaasarsiat annikillippata tamanna isiginiarneqartarpoq. Akerlianik pineqartut allanik najugaqateqarpata najugaqatigiit ilaata ataatsip aningaasarsiaasa annikinnerusumik allannguuteqarnerat maannakkorpiaq aningaasarsianut tamarmiusunut assinganik sunniuteqassanngilaq.

Sullississutinik tunniussinermi akiliutinilluunniit akileeqqusinermi inoqutigiit aningaasarsiaasa tamarmiusut isiginiarneqarnissaat suliaasaqarfinni arlalinni pingaartinneqartarpoq. Tamatumani ilaatigut eqqarsaatigineqarput ineqarnermut tapiissutit, utoqqaliniarsiat il. il. Sullississutinik tunniussinermi imaluunniit akigititanik il. il.

aalajangersaanermi maannakkorpiq aningaasarsiat tamarmiusut 5 procentimik taakkuluunniit qaangerlugit amerleriaateqarsimappata aatsaat nutaamik naatsorsuisoqartalernissaa siunnersuummi siunniunneqarpoq. Allanguinikkut naatsorsueqqittarnerit ikilissapput, innuttaasut aalajaannerusumik sullinneqalissapput aammalu pisortat allaffissornerat annikilleriaateqassalluni.

Naggataatigut inatsisissatut siunnersuut tassungalu nassuiaatit innersuussutigaa.

Taama oqaaseqarlunga Naalakkersuisut sinnerlugit siunnersuut Inatsisartunut oqaluuserisassanngortippara.